



GRAAIE



100 Joor Sans Gêne
Fyrr und Flamme
Jubel-Keenig
28. Novämber 2022

Bisch au du e KeenigIn?

Hit am Viertel ab 10ni de Morge n isch es exaggt 100 Joor häär.

Doozemool hänn sich in «Roth's Weinstube zu «Fischern» am Fischmäärt, zää Männer «zwecks Gründung einer neuen Fastnachtsgesellschaft» droffe. Dr Namme «Sans Gêne Clique» isch denn allerdings erscht acht Dääg schbeeter diskutiirt und beschlosse worde.

All die Joor hett d Glygge ungläubligi Gschichte n erläbbt und wie die ganzi Fasnachtswält sinn au mir extrem gschpannt, waas im Joor 2023, also an unserer 100schte Fasnacht, alles fir neiji Gschichte n in d Glygggeschicht wäärde n ygoo.



E kurze Ruggbligg

Luege mer an Aafang vom laufende Joor - es isch Jänner 2022 und es isch zem Briele, zem Eine vor Gligg - mer derfe wiider Fasnacht mache. Zem Andere n aber au uss Druur - waas isch mit all unsere Jubiläumsvorbereitige?

Mer zelebriere die 99. Fasnacht - wie gseet s mit dr 100schte Fasnacht uss? Derfe mer denn wiider e Fasnacht gniesse n ohni Corona-Beschränggige G, 2G, 3G, 4G oder waas au immer? Frooge n iber Frooge n und noo aini oobedruuff: «Wemmer die 100schi Fasnacht fyre, wie kenne mer alli Glyggemitgliider noonemool so richtig abhoole?».

Wie erwäänt, es isch Jänner 2022 gsi und wie alli Joor foot au daas Joor mit eme Highlight aa. Dr Schtamm trifft sich noo dr Blaggeddenussgoob zem obligate Neuijoorsbummel... Gnau, doo isch doch emool ebbis gsi?

Voor wenige Joore hämmer bym Apéro die goldigi Fonduegaable vergää. Wie die Wilde hämmer is z erscht uff Keenigskieche gschirtzt, zem Uusezfinde, wäär as gliggliche Keenig am Änd e Rundi Uno um die goldigi Fonduegaable schpiile darf.

Und gnau sälli Keenigskieche sinn nit ebbe numme Keenigskieche gsi, nai es sinn die Keenigskieche gsi - die mit de Borzellan-Fasnachtskeenig - die originale Kübler-Keenigskieche.



Kübler Syt iber 40 Joor gitt s in dr Beggerei Kübler e groossi Usswaal von Baggwaare n und Mittagssnacks. Gnauso gheert s zer joorelange Tradizion, ass es im Jänner allewyl e bsundere Drey-Keenigskueche mit eme n Original-Borzellan-Fasnachts-keenig gitt. Au im Joor 2023...

Gnau daas isch es: Waas wäär wenn...? Waas wäär wemmer - also du und ich - im Joor 2023 au im ene Keenigskueche verschtegt wääre: as Keenig... Waas wenn alli Strizzi, alli uss em Schtamm und alli vo dr Alte Garde n im Jubiläumsgoschtym au emool derfte Keenig sy?



Uff s Muul hogge

E n E-Mail zem Schtart voo n ere Reis, wo unheimlich schpannend und interessant gsi isch... Kurz noo dr Aafroog e n Antwort, wo seer positiv deent hett.



In ere Nacht-und-Näabelaggzion sinn denn die erschte Helge vom Keenigsmooll (ai Helge vo jedere Syte) entschtande. D Helge hänn noo miesse vom Kinschtler, wo fir d Beggerei Kübler d Doonfigur macht, abgnoo wäärde. Erfreuligerwys isch unser Voorhaabe für guet befunde worde n und dr Zueschlaag isch koo. Waas für e tolli Gschicht - mer sinn Keenig...!

Jetzt heisst s fascht e Joor lang uff s Muul hogge. S isch gsi, wie as glaine Gnopf Versteggis schpiile - allewyl lycht gribbelig und voller Voorfreud. Nääbeby sinn laufend Informazione koo, well s au wichtig isch, wie und wenn die Keenigsfiguur duur d Beggerei Kübler publiziert wird und wemmer ändlig unser Schwyge derfe bräche?

Hit, am 28. Novämber 2022, isch s esoo wyt

Am Daag, woo sich d Grindig vo dr Fasnachtsgsellschaft Sans Gêne zem 100schte Mool jäärt, kenne mer saage:

Härzliggi Gratulazion Sans Gêne und jä, au du bisch Keenig...!!!

Au e Keenig

E härzligs Danggscheen an d Beggerei Kübler. Es isch e Riisefreud und Eer, ass mer mit eych derfe n e Deil vo dääre wunderbaare Tradizion sy. Für die unkomplizierti Zämmenarbet und d Meeglichkeit, daas eimoolige n Erläänbis mit eych derfe z daile, bedangge mer is vo Härze. Mer winsche n e guete Verkauf und uff gly in dr Beggerei...☺!